



册府元龟  
卷之四十九  
至五十二

13  
849  
19





門 3  
849  
19



冊府元龜

淮南李嗣京參閱

西極文翔鳳訂正

豫章黃國琦較釋

帝王部 四十九

崇儒術

周官太宰之職以九兩繫邦國之民其一曰儒蓋六  
藝之謂也而太史公以為列君臣父子之禮序夫婦  
長幼之別雖百家不能易故歷代致治之後何莫繇  
斯道也已乃有朝舍干戈暮習俎豆誠知夫天下之



重非可馬上而治文武之道布在方策有條不紊可舉而行至於變風易俗之端長世字毗之術荒懷來遠之略邁德興仁之旨鮮不出於是矣繇是立庠塾設學校褒先儒以闡化尊經典以立訓咸用詮次存諸軌範

漢高祖十二年十一月行自淮南還過魯以太牢祀

孔子

文帝時天下亡治書者獨聞齊有伏生

臣欽若等曰伏生各勝

故秦博士治尚書年九十餘老不可至迺詔太嘗使人受之太嘗遣晁錯受尚書伏生所還因上書稱說

稱書法而說其義

詔以為太子舍人

武帝元朔五年六月詔曰蓋聞導民以禮風之以樂

今禮壞樂隳朕甚閔焉故詳延天下方聞之士咸薦

諸朝

詳悉也方道也聞博聞也言悉引有道博聞之士而進於朝也

其令禮官勸學

講議洽聞舉遺典禮以為天下先太嘗議與博士弟子崇鄉黨之化以厲賢材焉時御史大夫倪寬有俊才初見帝語經學帝說之曰吾始以尚書為樸學弗好及聞寬說可觀乃從寬問一篇擢為中大夫其後詔求為韓詩者徵蔡義待詔久不進見義上疏曰臣山東草莽之人行能無所比容貌不及眾然而不棄



人倫者竊以聞道於先師自託於經術也願賜清閒之燕燕安息也得盡精思於前帝召見義說詩甚說之擢為光祿大夫給事中

宣帝卽位聞衛太子好穀梁春秋以問丞相韋賢長信少府夏侯勝及侍中樂陵侯史高皆魯人也言穀梁子本魯學公羊氏迺齊學也宜興穀梁時蔡千秋為郎召見與公羊家竝說帝善穀梁說擢千秋為諫大夫給事中後有過左遷平陵令復求能為穀梁者莫及千秋帝愍其學且絕迺以千秋為郎中戶將戶將名選郎十人從受又梁丘賀從京房受易帝聞京房

為易名求其門人得賀賀時為都司空令坐事

為庶人待詔黃門數入說教侍中為諸侍中說以經為教授

召賀賀入說帝善之說於天子之前以賀為郎中修武帝故

事講六藝羣書博士盡奇異之

甘露三年詔諸儒講五經同異太子太傅蕭望之等平奏其議帝親稱制臨決焉乃立梁丘易大小夏侯尚書穀梁春秋博士

元帝卽位徵高密相孔霸為師霸上書求奉孔子祭祀帝下詔曰其令師褒成君關內侯霸以所食邑八百戶祀孔子焉故霸還長安子福名數於魯奉孔子



祀名數戶籍也帝好儒術文辭頗改宣帝之政言事者多進見人人自以為得帝意

初元五年詔博士弟子每置員以廣學者帝少而好儒及即位徵用儒生委之以政貢薛韋衡貢禹薛宣韋賢匡衡

迭為宰相

成帝河平三年八月光祿大夫劉向較中秘書謁者陳農使使求遺書於天下言令陳農為使而使之求遺書先是班伯

少受詩於師丹大將軍王鳳薦伯宜勸學召見宴昵

殿親戚宴飲會同之殿容貌甚麗誦說有法拜為中嘗侍帝方

鄉學鄭寬中張禹朝夕入說尚書論語於金華殿金華

殿在未央宮詔伯受焉既通大義又講異同於許商遷奉

車都尉數年金華之業績出

平帝元始元年封孔子後孔均為褒成侯奉其祀追

諡孔子為褒成宣尼公

後漢光武建武五年七月幸沛十月還幸魯使大司

空祠孔子是月初起太學在洛陽城故開陽門外去宮八里講堂長十丈廣三

丈帝幸太學賜博士弟子各有差

十四年四月封孔子後志為褒成侯平帝封孔均為褒成侯志均子

十九年立皇太子選求明經乃擢桓榮弟子豫章何湯為虎賁中郎將以尚書授太子帝從容問湯本師



為誰湯對曰事沛國桓榮帝即召榮令說尚書甚善之拜為議郎賜錢十萬入使授太子每朝會輒令榮於公卿前敷奏經書帝稱善曰得生幾晚會歐陽博士缺因拜榮為博士車駕幸太學會諸博士論難於前桓榮被服儒衣温恭有蘊藉蘊藉由言寬博有餘也辨明經義每以禮讓相厭不以辭長勝人儒者莫之及厭服也特加賞賜又詔諸生雅吹擊磬盡日乃罷吹管奏雅頌也明帝永平二年三月詔郡國縣道行鄉飲酒于學較皆祠先聖先師周公孔子牲以太牢孟冬亦如之九年四月開立學較置五經師自皇太子諸王侯及功臣子弟莫不受經

又為外戚樊氏郭氏馬氏諸子弟立學官四姓小侯以非列侯故曰小侯

十年九江人鮑駿上書言丁鴻經學至行帝甚賢之詔徵鴻至即召見說文侯之命篇賜御衣及授廩食公車與博士同禮

十五年帝東巡過魯幸孔子宅祠仲尼及七十二弟子親御講堂命皇太子諸王說經帝自制五經要說章句令桓郁較定於宣明殿一云帝自制五行章句此言五家即謂五行之

家也其後帝親於辟雍自講所制五行章句已復令郁說一篇帝謂郁曰我為孔子卿為子夏起予者商也又問郁曰子幾人能傳學郁曰臣子皆未能傳學孤



兄子一人學方起帝曰努力教之有起者卽白之  
章帝建初四年十一月詔曰蓋三代導人教學爲本  
漢承暴秦褒顯儒術建立五經爲置博士其後學士  
精進雖曰承師亦別名家孝宣帝以爲去聖久遠學  
不厭博故遂立大小夏侯尚書後又立京氏易至建  
武中復置顏氏嚴氏春秋大小戴博士皆所以扶進  
後學尊廣道藝也

中元元年詔書五經章句煩多義欲減省至永平元  
年長水校尉樊修奏言先帝大業當以時施行欲使  
諸儒共正經義令學者得以自助孔子曰學之不講

是吾憂也又曰博學而篤志切問而近思仁在其中  
矣於戲其勉之哉於是下太嘗將大夫博士議郎郎  
官及諸生儒會白虎觀講議五經同異使五官中郎  
將魏應承制問侍中淳于恭奏帝親稱制臨決如孝  
宣甘露石渠故事作白虎議奏先是建初元年較書  
郎楊終上言宣帝博徵羣儒論定五經於石渠閣方  
今天下少事學者得成其業而章句之徒破壞大體  
宜如石渠故事永爲後世則於是詔諸儒於白虎觀  
論考同異焉

八年十二月詔曰五經剖判去聖彌遠章句遺辭乖



疑難正恐先師微言將遂廢絕非所以重稽古求道  
真也其令羣儒選高才生受學左氏穀梁春秋古文  
尚書毛詩以扶微學廣異義焉  
元和元年帝巡狩之趙特引見趙相魯丕難問經傳  
厚加賞賜

二年三月帝東巡狩還過魯幸闕里以太牢祀孔子  
及七十二人作六代之樂大會孔氏男子二十以上  
者三人命儒者講論蘭臺令史孔僖因自陳謝帝曰  
今日之會寧於卿宗有光榮乎對曰臣聞明君聖主  
莫不尊師貴道今陛下親屈萬乘辱臨敝里此乃崇

禮先師增輝聖德至於光榮非所敢承帝大笑曰非  
聖者子孫焉有斯言乎遂拜僖郎中賜褒成侯絹及  
孔氏男子錢帛詔僖從還京師使較書東觀  
和帝永元十三年正月丁丑帝幸東觀覽書林閱篇  
籍博選術藝之士以充其官

安帝延光二年詔選三署郎及吏人能通古文尚書  
毛詩穀梁春秋一人  
三年三月幸泰山祀孔子及七十二弟子於闕里自  
魯相令丞尉及孔氏親屬婦女諸生悉會賜褒成侯  
以下帛各有差遂還京師幸太學



順帝永建六年九月繕起大學

靈帝熹平四年三月詔諸生正五經文字刻石立於

大學門外

六年十月帝親臨辟雍

光和元年二月始置鴻都門學生

鴻都門名也於內置學詩辭賦及工

書鳥篆者相課試至千人焉

二年六月詔公卿舉能通尚書毛詩左氏穀梁春秋各一人悉除議郎

魏太祖為漢丞相以建安八年秋七月令曰喪亂已來十有五年後生者不見仁義禮讓之風吾甚傷之

令郡國各修文學縣滿五百戶置較書選其鄉之俊

造而教學之庶幾先王之道不廢而有以益於天下

既為魏王以建安二十二年五月作泮宮

文帝黃初二年正月詔曰昔仲尼資大聖之才懷帝

王之器當衰周之末無受命之運在魯衛之朝教化

乎洙泗之上棲棲焉遑遑焉欲屈已以存道貶身以

救世於時王公終莫能用之乃退考五代之禮脩素

王之事因魯史而制春秋就太師而正雅頌俾千載

之後莫不宗其文以述作仰其聖以成謀茲可謂命

世之大聖億載之師表者也遭天下大亂百祀墮壞



舊居之廟毀而不修褒成之後絕而莫繼闕里不聞講頌之聲四時不覩蒸嘗之位斯豈所謂崇禮報功盛德百世必祀者哉其以議郎孔羨爲宗聖侯邑百戶奉孔子祀令魯郡修起舊廟置百戶吏卒以守衛之又於其外廣爲室屋以居學者

明帝大和二年六月詔曰尊儒貴學王教之本也自頃儒官或非其人將何以宣明聖道其高選博士才任侍中嘗侍者申勅郡國貢士以經學爲先

景初中帝以高堂隆蘇林秦靜等老恐無能傳業者乃詔曰昔先聖旣沒而其遺言餘教著於六藝六藝

之文禮又爲急弗可斯須離者也末俗背本所繇來久故閔子譏原憲之不學荀卿醜秦世之坑儒儒學旣廢則風化曷繇興哉方今宿生巨儒並各年高教訓之道孰爲其繼昔伏生將老漢文帝嗣以晁錯穀梁寡疇宣帝承以十郎

臣欽若等曰選郎十人從受

其科郎吏高

才解經義者三十人從光祿勳隆散騎嘗侍翰林博士靜分受四經三禮主者具爲設課試之法夏侯勝昔有言士病經不明經術苟明其取青紫如俯拾地芥耳今學者有能究極經道則爵祿榮寵不期而至可不勉哉數年隆等皆卒學者遂廢



齊王正始二年二月初通論語使太嘗以太牢祭孔子於辟雍以顏淵配

五年五月講尚書經通使太嘗以太牢祀孔子於辟雍以顏淵配賜太傅大將軍及侍講者各有差

六年詔故司空王朗所作易傳令學者得以課試

七年十二月講禮記通使太嘗以太牢祀孔子於辟雍以顏淵配

晉武帝泰始三年十一月改宗聖侯孔震爲奉聖亭侯又詔太學及魯國四時備三牲以祀孔子

咸寧二年五月立國子學

元帝建武元年十一月立太學

明帝太寧三年詔給奉聖亭侯孔震四時祀孔子祭宜如泰始故事

成帝咸康元年二月講詩通釋奠如故事

三年正月辛卯立太學

穆帝升平元年三月帝講孝經通親釋奠於中堂

孝武帝寧康三年七月帝講孝經通釋奠如故事時

以學在水南懸遠有司定議依升平元年於中堂權

立行太學于時無復國子生有司奏應須復二學生

百二十人太學生取見人六十國子生權銓大臣子



孫六十人事訖罷奏可釋奠禮畢會百官六品以上  
十二月帝釋奠于中堂祀孔子以顏回配時學較陵  
遲謝石上疏請興復國學以訓胄子班下州郡普修  
鄉較疏奏帝納焉

大元十年二月立國學又增置太學生百人

十一年八月封孔靖之為奉聖亭侯奉宣尼祀

後魏道武天興四年二月丁亥命樂師入太學習舞  
釋菜于先聖先師

大武始光三年二月起太學於城東祀孔子以顏淵  
配

太平真君十一年南伐至鄒山使使者以太牢祀孔

子

獻文皇興二年以青徐平詔中書令高允兼太嘗至  
兗州以太牢祭孔子廟帝謂允曰此簡德而行勿有  
辭也

孝文延興二年二月詔曰尼父稟達聖之姿體生知  
之量窮理盡性道光四海頃者淮徐未賓廟隔非所  
致令祠典寢頓禮章殄滅遂使女巫妖覘淫進非禮  
殺生鼓舞倡優媒狎豈所以尊神明敬聖道者也自  
今以後有祭孔子廟制用酒醑而已不聽婦女雜合



以祈非望之福犯者以違制論其公家有事自如嘗  
禮犧牲粢盛務盡豐潔臨事致敬令肅如也可牧之  
官明糾不法使禁令必行

三年四月詔以孔子二十八世孫魯郡孔乘為崇聖  
大夫給十戶以供灑掃

太和十三年七月立孔子廟於京師

十六年二月丁未改謚宣尼曰文聖尼父告謚孔子

廟一云二月癸丑帝臨宣文堂引儀尚書劉昶鴻臚  
卿游明根行儀曹事李韶授策孔子崇文王之謚

於是昶等就廟行事  
既而帝親拜祭於廟

四月甲寅幸皇宗學親問博士經義

十七年九月壬申幸太學觀石經

十九年四月幸魯城親祀孔子廟詔拜孔氏子二人

為官又詔選諸孔宗子一人封崇聖侯邑一百戶以

奉孔子之祀又詔兗州為孔子起園寢修飭墳壠更

建碑銘褒揚聖德

六月詔求天下遺書秘閣所無有裨益時用者加以

優賞

宣武正始元年十一月詔曰古之哲王勗業垂統安

民立化莫不崇建膠序開訓國胄宣昭三禮崇明四

術使道暢羣邦風流萬宇自皇基始構光宅中區軍



國務殷未遑經建靖言思之有慚古烈可勅有司使漢魏舊章營繕國學

四年四月詔曰高祖德格兩儀明並日月播文教以懷遠人調禮學以旌僞造徙縣中區光宅東邑總霜露之所均一姬卜於洛汭戎繕兼興未遑儒教朕纂承鴻緒君臨寶曆思模聖規述遵先志今天平地寧方隅無事可勅有司准倣前式置國子立太學樹小學於四門

永平三年六月詔重求遺書於天下

延昌元年四月詔曰遷京嵩縣年將二紀虎闌闐唱

演之音四門絕講誦之業博士端然虛祿歲祀貴介之胄歎同子衿靖言念之有兼愧慨可嚴勅有司國子學孟冬使成大學四門年暮容令成就

孝明正光元年正月詔曰建國緯民立教為本尊師崇道並典自昔來歲仲陽節和氣潤釋奠孔顏乃其時也有司可豫繕國學圖飾聖賢置官簡牲擇吉備禮

二年二月癸亥幸國子學講孝經令車騎大將軍領

國子祭酒崔光執經南面百僚陪列又云孝明行講學之禮於國子寺司徒崔光執經勅常景與董紹張澈馬元興王延業鄭伯猷等俱為錄義



三月庚午幸國子學祀孔子以顏淵配

出帝永熙三年二月丙子親釋奠禮先師詔延公卿

學官於顯陽殿勅祭酒劉焯講孝經黃門李郁講禮

記中書舍人盧景宣解大戴禮夏小正篇時廣招儒

學引令預聽國子博士李同執經義素優辨析兼美

而不得執經深為慨恨

後周明帝雅愛文史立麟趾學在朝有藝業者不限

貴賤皆預聽焉

乃至蕭攝王褒等卑鄙之徒同為學士太宗伯于翼言於帝曰蕭攝梁之

宗子王褒梁之公卿今與趨走同儕恐非尚賢貴爵之義帝然之詔翼定其班次於是

武帝天和元年七月詔諸胄子入學但束脩於師不

勞釋奠釋奠者學成之祭自今即為嘗式

二年七月立露門學置生七十二人

時辛公義為太學生帝召入露

門學令受道義每月集御前令與大儒講論數被嗟異時輩慕之

宣帝大象元年詔徙鄴城石經於雒陽

二年二月丁巳幸露門學行釋奠之禮

三月詔曰盛德之後是稱不絕功施於民義昭祀典

孔子德惟藏往道實生知以大聖之才屬千古之運

載引儒業式敘彝倫至如幽贊天人之理裁成禮樂

之務故以作範百王垂風萬乘朕欽承寶曆服膺教

養眷言洙泗懷道滋深而褒成啓號雖彰故實旌崇



聖績猶有闕如可追封爲鄒國公邑數准舊并奕後承襲別於京師置廟時以祭享

隋高祖開皇二年十一月賜國子生經明者束帛

三年二月詔購求遺書於天下

四月詔天下勸學行禮時潞州刺史柳昂見天下無事上表請勸學行禮帝覽而善之因下詔曰建國重道莫先於學尊主庇民莫善於禮自魏氏不競周齊抗衡分四海之民鬪二邦之力遞爲強弱多歷年所務權詐而薄儒雅重干戈而輕俎豆民不見德唯爭是聞朝野以機巧爲師文吏用深刻爲法風澆俗敝

化之然也雖復建立庠序兼啓黌塾業非時貴道亦不行其間服膺儒術蓋有之焉彼衆我寡未能移俗然其維持名教獎飾彝倫微相弘益賴斯而已王者承天休咎隨化有禮則祥瑞必降無禮則妖孽興起人稟五常性靈不一有禮則陰陽合德無禮則禽獸其心治國立身非禮不可朕受命於天裁成萬物去華夷之亂求風化之宜戒奢崇儉率先百辟輕徭薄賦冀以寬和而積習生常未能懲革閭閻士庶吉凶之禮動悉乖方不依制度執憲之職似塞耳而無聞蒞民之官若蔽目而不察宣揚朝化其若是乎古人



之學且耕且養今者民丁非役之日農畝時侯之餘若敦以學業勸以經術自可家慕大道人希至德豈止知禮節識廉恥父慈子孝兄恭弟順者乎始自京師爰及州郡宜祇朕意勤學行禮自是天下州縣皆置博士習禮焉

仁壽元年六月詔曰儒學之道訓教生人識父子君臣之義知尊卑長幼之序升之於朝任之以職故能贊理時務弘益風範朕撫臨天下思弘德教延集學徒崇建庠序開仕進之路佇賢雋之人而國學胄子垂將千數州縣諸生成亦不少徒有名錄空度歲時

未有德爲代範才任國用良繇設學之理多而未精今宜簡省明加獎勵於是國子學唯留學生七十人大學四門及州縣學並廢

煬帝大業元年閏七月詔曰君民建國教學爲先移風易俗必自茲始而言絕義乖多歷年代進德脩業其道浸微漢採坑儒之餘不絕如線晉承板蕩之運掃地將盡自時厥後軍國多虞雖復黌宇時建示同愛禮函丈或陳亦爲虛器遂使紆青拖紫非以學優制錦操刀類多墻面上陵下替綱維靡立雅缺道消實繇於是朕纂承洪緒思弘大訓將欲尊師重道用




闡厥繇講信修睦敦獎名教今宇宙平一文軌攸同  
十步之內必有芳草四海之中豈無奇秀諸在家及  
見入學者若有篤志好古耽悅典墳學行優敏堪膺  
時務所在採訪具以名聞卽當隨其器能擢以不次  
若研精經術未願進仕者可依其藝業深淺門蔭高  
卑雖未升朝並量准給祿庶夫恂恂善誘不日成器  
濟濟盈朝何遠之有其國子等學亦宜申明舊制教  
習生徒具爲課試之法以盡砥礪之道

四年十月詔曰先師尼父聖德在躬誕發天縱之姿  
憲章文武之道命世應期蘊茲素業而頽山之歎忽  
踰於千祀盛德之美不存於百代永惟懿範宜有優  
崇可立孔子後爲紹聖侯有司求其苗裔錄以申上

冊府元龜卷之四十九終





冊府元龜

淮南李嗣宗參閱

西極文翔鳳訂正

豫章黃國琦較釋

帝王部 五十

崇儒術第二

唐高祖武德二年詔曰盛德必祀義存方策達人命世流慶後昆建國君臨弘風闡教崇賢章善莫尚於茲自八卦初陳九疇攸叙徽章旣革節文不備爰始姬旦主翊周邦創設禮經大明典憲啟生人之耳目



窮法度之本原化起二南業隆八百豐功茂德獨冠  
終古暨乎王道既衰頌聲不作諸侯力爭禮樂陵遲  
粵若宣尼天姿獻哲經過齊魯之際揖讓洙泗之間  
綜理遺文弘宣舊制四科之教歷代不刊三千之徒  
風流無敬惟茲二聖道著生民宗祀不修孰明褒尚  
朕君臨區宇興化崇儒永言先達情深紹嗣宜令有  
司於國子學立周公孔子廟各一所四時致祭仍博  
求其後具以名聞計考所宜當加爵土  
七年二月詔曰六經茂典百王仰則四學崇教千載  
垂範是以西膠東序春頌夏弦悅禮敦詩本仁祖義

建邦立極咸必繇之自叔世澆訛雅道淪缺懸歷歲  
紀儒風莫扇隋季以來喪亂茲甚瞻言篇籍皆爲煨  
燼周孔之教闕而不脩庠塾之義泯焉將墜非所以  
闡揚徽烈敦尚風範訓民調俗垂裕後昆朕受命膺  
期握圖馭宇思弘至道翼宣德化永言墳索深存講  
習所以摅擴遺逸招集散亡諸生胄子特加獎勸而  
凋弊之餘湮替日以學徒尚少經術未隆子衿之歎  
無忘興寢方今函夏旣清干戈漸戢縉紳之業此則  
可興宜下四方諸州有明一經已上未被升擢者本  
屬舉送具以名聞有司試策加階叙用其吏民子弟



有識性開敏志希學藝亦具名狀申送入京量其差  
品竝卽配學明設考課各使勵精琢玉成器庶其非  
遠州縣及鄉各令置學官察牧宰或不存意普更頒  
下早遣立脩夫安上治民莫善於禮出忠入孝自家  
刑國揖讓俯仰登降折旋皆有節文咸資端肅末業  
踈惰隨時將廢凡厥生民各宜免勵又釋奠之禮致  
敬先師鼓篋之義以明遜志比多聞略更宜詳備仲  
春釋奠朕將親覽所司具爲條式以時宣下是月丁  
巳帝幸國子學親臨釋奠引道士沙門有舉業者與  
博士雜相駁難久之乃罷因下詔曰自古爲政莫不

以學則仁義禮智信五者具備故能爲利博深朕今  
欲敦本息末崇尚儒宗開後生之耳目行先王之典  
訓而三教雖異善歸一揆沙門事佛靈宇相望朝賢  
宗儒辟雍頓廢公王以下寧得不慙朕今親觀覽仍  
徵集四方胄子冀日就月將竝得成業禮讓旣行風  
教漸改使期門介士比屋可封橫經庠序皆遵雅俗  
諸公王子弟竝皆率先自相勸勵賜學官胄子及五  
品以上各有差

太宗貞觀十年封孔子裔孫德倫爲褒聖侯

十二年二月丁丑幸國子學親觀釋奠國子祭酒以



下官及學生高弟精勤者加級賜帛各有差  
二十一年二月詔曰左丘明卜子夏公羊高穀梁赤  
伏勝高堂生戴聖毛萇孔安國劉向鄭衆杜子春馬  
融盧植鄭康成服子慎何休王肅王輔嗣杜元凱范  
甯等二十有一人竝用其書垂於國胄旣行其道理  
合崇褒自今有事於大學可竝配享尼父廟堂  
高宗永徽元年六月詔曰昔勲華肇政仁義居先殷  
周創基教學成本朕嗣立鴻基裁成丕緒如臨於海  
罔知攸濟思得學徒用康庶績而頃歲所敦先諸聖  
教青襟方領未達至懷唯欲思轅固以加班想高堂

以授秩

臣欽若等曰轅固轅生也高堂高堂隆也

斯文寥落去之彌遠深

加發慮稱朕意焉儒官員缺即宜補授其館博士助  
教節級賜物三館學士有業科高第景行淳良者所  
司簡試具以名聞

乾封元年正月帝東封次曲阜縣追贈孔子為太師  
其廟宇制度卑陋宜加脩造仍以少牢致祭  
總章元年三月詔曰皇太子弘近因釋菜齒胄上庠  
祇事先師馳心近侍仰崇山而景行眷曩哲以勤懷  
顯顏曾之特高揚仁義之雙美請申褒贈載甄芳烈  
朕加其進德冀以思齊訓誘之方莫斯為尚顏回可



贈太子少保

咸亨元年五月詔曰諸州縣孔子廟堂及學館有破

壞并先來未造者遂使生徒無肄業之所先師闡奠

祭之儀久致飄零深非敬本宜令所司速事營造

中宗神龍元年五月制以鄒魯之邑百戶為太師隆

道公則天封孔子為隆道公宣尼采邑收其租稅用供薦享又

授裔孫褒聖侯崇基朝散大夫仍許子孫以相傳襲

景龍三年六月以經籍多殘缺令京官有學行者分

行天下搜括圖籍

睿宗景雲元年七月制曰朕克繼丕業肇膺景命憲

章昔與欽若前王永言政途庶幾泐革循恐學較多

聞賢俊罕登庠序者風化之本人倫之先宜令州縣

勸導令知禮讓

太極元年正月制孔宣公祠廟令本州修飾取側近

三十戶以供灑掃二月追贈顏子為太子太師曾子

為太子太保並配享於孔子

玄宗開元二年四月詔曰古之學士始入小學見小

節入大學見大節知父子長幼之序君臣上下之位

然後師逸功倍化人成俗莫不繇之子不云乎遠而

有光者飾也近而逾明者學也故道行於上祿在其



中所謂貴於速成不唯於遲達自頃州里所薦公卿之緒門人衆矣孰嗣子音國胄顯然未臻吾道至使鑽仰之地寂寥厥風貴於責實務欲求仕將去聖滋遠尚泐澆薄爲敦儒未弘不行勸沮朕承百王之末居四海之尊惟懷永圖思革前弊何以發後生之智慮垂先王之法則朕甚懼之敢忘於是天下有業擅專門學優重席堪師授者所在具以名聞自今以後貢舉人等宜加勗勉須獲實才如有義疏未詳習讀未遍輒充舉送以希僥倖所繇官竝寘藝憲有司更申明條例稱朕意焉

五年五月以故朝散大夫褒聖侯孔宗基嫡子璉芝襲封褒聖侯

九月詔曰古有賓獻之禮登於天府揚於王庭重學尊儒興賢造士故能美風俗成教化盖先王之所繇焉朕以寡德欽若前政思與大夫羣士復臻於理故他日訪道有時忘食乙夜觀書分宵不寢悟專經之義篤知學史之文繁未懷覃思有足尚者不示褒崇孰云獎勸其諸州鄉貢明經進士見訖宜令引就國子監謁先師學官爲之開講質問疑義仍令所司優厚設食兩館及監府得舉人亦准此其日朝請官五



品已上及朝集使往觀禮卽爲嘗式易曰學以聚之  
問以辨之詩云如切如磋如琢如磨此朕所望於賢  
才矣

七年三月詔曰孝經尚書有古文本孔鄭注其中指  
趣頗多踏駁精義妙理若無所歸作業用心復何所  
適宜令諸儒併訪後進達解者質定奏聞又詔曰孝  
經者德教所先自頃已來獨宗鄭氏遺旨今則無聞  
又子夏易傳近無習者輔嗣注者亦甚既明諸家所  
傳互有得失獨據一說能無短長其儒官詳定所長  
令明經者習讀若將理等亦可兼行其作易者兼帖

子夏易傳共爲一部亦詳其可否奏聞時議以爲不  
可遂停

五月麗正殿寫四庫書勅秘書昭文禮部國子監太  
嘗寺及諸司官人百官等家就借寫之

八年三月詔曰顏生等十哲宜爲坐像從祀曾參大  
孝德冠同列特爲像坐於十哲之次因畫七十子及  
二十二賢於廟堂壁以顏回亞聖親爲製贊以書於  
石乃命當朝文士分爲之贊題其壁焉

十一月詔貢舉人謁先師開講仍令朝集使及京官  
觀禮



十三年十一月封東嶽禮畢幸孔子宅親設奠祭詔曰孔宣父誕聖自天垂範百代作王者之師表開生人之耳目朕增封岱岳迴鑾泗濱思闕里之風想雩壇之詠逃矣遺烈慨然永懷式遵祀典用申誠敬宜令禮部尚書蘓頌以太牢致祭仍令州縣以時祀享復近墓五戶長供掃除  
二十二年四月詔曰風化之本其在庠序去秋不熟生徒斃令就舍講習之地安可久閑其兩監生在外者卽宜赴學

二十七年八月追贈先聖夫子爲王諡曰文宣制曰

弘我王化在乎儒術能發揮此道啟迪含靈則生人以來未有如夫子者也所謂自天攸縱將聖多能德配乾坤身揭日月故能立天下之大本成天下之大經美政教移風俗君君臣臣父父子子人到於今受其賜不其猗歟鳴戲楚田莫封魯公不用俾夫大聖纔列陪臣棲遑旅人固可知矣年祀浸遠光靈益彰雖代有褒稱而未爲崇峻不副於實人其謂何朕以薄德祇膺寶命思闡文明廣被華夏時則異於今古情每重於師資旣行其教合旌厥德爰申盛禮載表徽猷夫子旣曰先聖可追謚爲文宣王宜令三公持



節冊命其文宣王陵并舊宅廟量加人灑掃用展誠敬其後嗣褒聖侯宜改爲文宣公至如辦方正位著自禮經苟不合度何以示則昔緣周公南面夫子西坐今位既有殊坐豈仍舊宜補其墜典作茲成式自今以後兩京國子監及天下諸州夫子南面坐十哲等東西列侍且門人三千則見今稱十哲包夫衆美實越等夷暢玄聖之風軌發人倫之耳目竝宜褒贈以寵賢明顏子淵旣云亞聖須優其秩可贈充公閔子騫贈費侯冉伯牛贈鄆侯仲弓贈薛侯冉子有贈徐侯仲子路贈衛侯宰子我贈齊侯端木子貢贈黎

侯言子游贈吳侯卜子夏贈魏侯又夫子格言參也稱魯雖居七十之數不載四科之目允稽先旨俾循舊位庶乎禮得其序人焉式瞻宗洙泗之丕烈重膠庠之雅範布告中外咸使知聞丁亥命尚書左相裴耀卿攝大尉持節往冊于廟始正南面改冕服樂用宮懸己丑追贈曾參等六十七人皆爲伯參爲成伯顓孫師爲陳伯澹臺滅明爲江伯宓子賤爲單伯原憲爲原伯公冶長爲莒伯南宮适爲剡伯公皙哀爲郟伯曾點爲宿伯顏路爲杞伯商瞿爲蒙伯高柴爲共伯漆雕開爲滕伯公伯寮爲任伯司馬牛爲向伯



樊遲爲樊伯有若爲卞伯公西赤爲邵伯巫馬期爲  
鄆伯梁鱸爲梁伯顏柳爲蕭伯冉孺爲郈伯曹卹爲  
豐伯伯虔爲鄒伯公孫龍爲少梁伯漆雕歛爲武城  
伯顏子驕爲瑯琊伯漆雕徒父爲須句伯壤駟赤爲  
北徵伯商澤爲睢陽伯石作觸爲后邑伯任不齊爲  
任城伯公夏首爲允父伯公良孺爲東牟伯石處爲  
營■伯秦開爲彭衙伯奚容蒧爲下邳伯公肩定爲  
新田伯顏襄爲臨沂伯鄆單爲銅鞮伯句井彊爲洪  
陽伯罕父黑爲乘丘伯秦商爲上雒伯申黨爲召陵  
伯公祖子之爲期思伯榮子祺爲雩婁伯縣成爲巨

野伯左人郢爲臨菑伯燕伋爲漁陽伯鄭子徒爲榮  
陽伯秦非爲汧陽伯施之嘗爲乘氏伯顏噲爲朱虛  
伯步叔乘爲淳于伯顏之僕爲東武伯原亢籍爲萊  
蕪伯樂欬爲昌平伯廉潔爲莒父伯顏何爲關陽伯  
叔仲會爲瑕丘伯狄黑爲臨濟伯邾吳爲平陸伯孔  
忠爲文陽伯公西輿爲長丘伯公西蒧爲祝阿伯制  
曰道可褒崇豈限今古則追贈之典旌德存焉夫子  
弟子十哲之外曾參等六十七人同升孔門博習儒  
術子之四教爾實行之親奉微言式揚大義是稱達  
者不其盛歟欽若古風載崇玄聖至於十哲亦被寵



章而子輿之倫未有稱謂宜亞四科之士以疏五等之封俾與先師咸膺盛禮

二十八年詔曰先聖文宣王春秋釋奠宜令攝三公行禮著之嘗式

天寶元年七月詔曰古之教人蓋有彛訓必在勤學使知其方故每月釋菜之時嘗開講座用以發明聖旨啟迪生徒待問者應而不窮懷疑者質而無惑弘益之致不其然歟或有凡流矜於小辨初雖論難終雜詆諧出言不經積習成弊自今以後除問難經典之外不得輒請宜令本司長官嚴加禁止仍委御史

糾察

十一月改驪山爲會昌山仍於秦坑儒之所立祠宇

以祀遭難諸儒

臣欽若等按賈至文集有旌儒廟碑奉勅撰也

二年十月制曰朕永惟聖道思闡儒風故尊崇先王所以弘至教褒獎後嗣所以美前列文宣王三十五代孫通直郎前守邠王府文學褒聖侯孫璲芝纂承睿哲克復中庸三命益恭敦素憑於祖業百代必祀光寵被於朝恩積慶之餘旣開於士宇盛德不朽宜傳於帶礪可襲文宣公

三載七月詔曰朕欽惟載籍討論墳典以爲先王令



範莫越於唐虞上古遺書寔稱於訓誥雖百篇奧義前代或亡而六體奇文舊規猶在但以古先所制有異於當今傳寫浸訛轉疑於後學永言刊革心在從宜尚書應是古體文字竝依今字繕寫施行典謨無乖於古訓庶遵簡易有益於將來其舊本仍藏之書府

五載正月詔曰禮經垂訓篇目攸殊或未盡於通體是有乖於大義借如堯命四子所授惟時周分六官曾不繫月先王行令蓋取於斯苟分至之可言何弦望之是舉其禮記月令宜改爲時令

十四載四月勅國子監諸生等旣非舉時又屬暑月在於館學恐漸炎蒸其有欲歸私第及還鄉貫習讀者竝聽仍委本司長官具名申牒所繇任至舉時赴監東京監亦准此

代宗廣德二年七月甲申集賢殿大學士中書舍人侍郎平章事元載奏集賢院圖書自經寇盜墜失頗多請開贖書之令得一卷賞一千錢許之

丙午勅曰古者設大學教胄子所以延俊造揚王庭雖年穀不登兵甲或動而俎豆之事未嘗廢焉頃年已來戎車屢駕天下轉輸公私匱竭帶甲之士所務



羸糧鼓篋之徒未能仰給繇是諸生輟講經誦菴聞  
宣父有言是吾憂也投戈息馬論道尊師用弘庠序  
之風俾有簞瓢之樂宜令所司量追集賢學士精加  
選擇使在館習業仍委度支准給廚米敦茲儒術庶  
有大成甲科高懸好學者中求茂異稱朕意焉

永泰二年正月詔曰理道同歸師氏爲上化人成俗  
必務于學俊造之士皆從此途國之貴遊罔不受業  
修文行忠信之教崇禮義孝友之德盡其師道乃謂  
成人然後揚于王庭考以政事徵之以禮任之以官  
寘於周行莫匪邦彥樂得賢也其在茲乎朕志求理

道尤重儒術先王設教敢不底行頃以戎狄多虞急  
於經略大學空設諸生益寡弦誦之地寂寥無聲函  
丈之間殆將不掃上庠及此甚用憫焉今寓縣又寧  
文武兼代方投戈而講藝俾釋菜以行禮四科咸進  
六藝復興神人以和風化浸美日用此道將無間然  
其諸道節度觀察都防禦使等朕之腹心久鎮方面  
眷其子弟各奉義方脩德立身是資藝業又恐干戈  
之後學較尚微僻居遠方無所諮稟山東寡問質疑  
必就於馬融關西盛名尊儒乃稱於楊震負經求學  
當集京師并宰相朝官及神策六軍將子弟欲得習



學者自今以後并令補國子學生欲其業重籛金器成琢玉日親厥德代不乏賢其中身雖有官欲附學讀書者亦聽其學官委中書門下即簡擇行業堪為師範者充學生員數多少所習經業考試等并所供糧料及緣學館破壞要量事脩理各委本司條件聞奏務須詳悉稱朕意焉

二月丁亥朔國子監釋奠賜宰臣以下嘗參官錢殮錢五百貫於國子監造食許內侍魚朝恩同聽講經辛卯命有司增脩文宣王廟及國子監解宇

八月丁亥國子監釋奠始復用牲牢

初上元二年九月詔諸生獻禮

至是乃舉舊典遣宰臣及嘗參官於國子監觀禮

大曆二年二月丁亥仗下後宰臣及嘗參官等詣國子監觀釋奠講論內侍魚朝恩參其會焉

八月丁亥有司釋奠于國學宰臣及百官并內侍魚朝恩同會于國子監觀講論

三年八月丁未釋奠於文宣王廟禮畢內侍魚朝恩及宰臣文武百官咸詣國子監觀講論有司陳饌詔遣中使賜酒及三勸獎

四月丁未釋奠於文宣王許百寮詣國學觀講論德宗建中三年閏正月以文宣王三十七代孫齊賢



爲兗州司功參軍襲文宣公

貞元二年二月丁卯有司釋奠於文宣王廟自宰臣以下畢集於國學學官升講座陳五經大旨先聖之道

憲宗元和元年正月丁卯詔國子監祭酒司業及學官并先取朝廷有德望學識者充東都國子監諸館共置學生百員

二年十二月丁巳東都國子監增置學生一百人

四年二月以文宣王三十八代孫惟昉爲兗州都督府參軍

十三年正月詔文宣王三十八代孫惟暉可襲文宣公

穆宗長慶元年兗州觀察使曹華奏准勅赦文賜文宣王三十八代孫惟暉絹五十疋

敬宗寶曆元年制曰天下諸色人等能精通一經堪爲師法者委國子祭酒訪擇具名聞天下州縣各委刺史縣令招延儒學明加訓誨  
文宗太和六年二月己丑以寒食宴百寮於麟德殿是日雜戲中有孔子爲戲者帝曰孔子爲古今之師焉得黷侮如此命驅去



七年八月制曰漢代用人皆繇儒術故能風俗深厚教化興行近日苟尚浮華莫脩經術鄉舉里選不可復行然務實抑華必有良術旣當甚弊思其改張今寰宇乂寧干戈已戢皇太子方從師傅受六經一二年之後當令齒胄國庠以興隆典宜令國子監於諸道搜訪名儒置五經博士各一人  
八年七月堂帖中書門下御史臺尚書省諸道節度觀察使置令各舉解周易一人  
武宗會昌元年以文宣王三十九代孫策爲國子監丞襲文宣公

昭宗大順元年二月詔曰有國之規無先學較理官之要莫尚儒宗故前王設塾庠陳齒胄所以敷揚至道弘闡大猷者也國學自朝廷喪亂以來棟宇摧殘之後歲月斯久榛蕪可知宜令諸道觀察使刺史與賓幕州縣文吏等同於俸料內量力分抽以助脩葺哀帝天祐元年十月前絳州曲沃縣令高虔魯納史館書籍三百六十卷授兼監察御史賜緋  
後唐莊宗同光二年二月制三館蘭臺藏書之府動盈萬卷詳列九流爰自亂離悉多遺逸須行搜訪以備討尋應天下有人能以經史及百家進納者所司



立等第酬獎

四月樞密使郭崇韜又奏曰伏以館司四庫藏書舊日數目至多自廣明年後流散他方宜示獎勵俾申搜訪伏乞委中書門下再行勅命遍下逐道或有人家藏能以經史百家之書進獻數及四百卷以上者請委館司點勘無脫漏於卷軸無重疊於篇題比外寫札精詳裝飾周備當據部帙聞奏請量等級除官仍仰長史明懸榜示卽鄉較庠塾之業漸闡皇風金石絲竹之音無虞隆典勅史館提舉赦書節文購求經史頗爲允當宜許施行今宜添進納四百卷已下

參百卷已上皆成部帙不是重疊及紙墨書寫精細已在選門未合格人一百卷與減一選無選減數者注官日優與處分無官者納書及三百卷特授試官明宗天成二年都官郎中庾傳美訪圖書於三川孟知祥處得九朝實錄及雜書傳千餘卷竝付史館同光已後館中煨燼無幾九朝實錄甚濟其闕長興元年正月以文宣王四十三代孫陵廟主仁玉爲曲阜縣主簿

三年二月中書奏請依石經文字刻九經印板勅旨教導之本經籍爲宗兵革已來庠序多廢縱能傳授



罕克精研繇是豕亥有差魯魚爲弊苟一言致誤則大義全乖儻不討詳漸當紕繆宜令國學集博士儒徒將西京石經本各以所業本經句度抄寫注出子細勘讀然後召僱能雕字匠人各隨部帙刻印板廣頒天下如諸色人要寫經書竝須依所印勅本不得更使雜本交錯所貴經書廣布儒教大行

五月甲申以文宣王四十三代孫曲阜縣主簿孔仁玉爲兗州龔丘縣令襲封文宣公

愍帝應順元年正月詔進書官劉嘗鄭州滎陽令單驥唐州司法叅軍今後三館所闕書竝訪本添寫其

進書官權停

晉高祖天福五年四月辛酉以文宣王四十三代孫襲文宣公孔仁玉爲兗州曲阜縣令

周太祖廣順二年五月親往兗州辛未遣端明殿學士顏行往曲阜祀文宣王廟

六月己酉幸曲阜謁孔子祠旣畢將致敬左右曰仲尼人臣也無致敬之文太祖曰文宣百代帝王師也得無敬乎卽拜奠於祠前其所奠金器銀爐十數事畱於祠所以備享獻遂幸孔林拜孔子墓墳側有石壇是唐朝封禪迴謁孔子之壇二百餘年間絕東封



之禮洙泗之無復鑾和之音帝以武功之餘枉車  
致敬尊師重道不亦優乎

世宗顯德三年十二月詔曰史館所少書籍宜令本  
館諸處求訪補填如有收得書籍之家竝許進納其  
進書人部帙多少等第各與恩澤如是卷帙少者量  
給資布如館內已有之書不在進納之限

冊府元龜卷之五十終

冊府元龜

淮南李嗣京參閱

西極文翔鳳訂正

豫章黃國琦較釋

帝王部 五十一

崇釋氏

昔漢明帝兆慶於金人楚王英為蒲塞桑門之饌錄  
是竺乾之教被於中夏其所述之旨所謂三歸五戒  
十善業四無量心四無色定以極人天之果四諦十  
二因緣六波羅蜜以辯三乘之位經律論以紀三藏

冊府元龜 帝王部

卷之五十一



之名數至于覺一切種智證無生法忍此所以登圓  
 寂而成佛道也歷代帝王或崇奉其事營建塔廟增  
 嚴像設翻譯梵文廣度淨衆蓋以茂植德本樹立衆  
 善爲民祈福毆之仁壽斯亦大易神道設教之旨歟  
 漢武帝元狩中遣嫫姚將軍霍去病討匈奴至畢蘭  
 過居延昆耶王將其衆五萬來降獲其金人帝以爲  
 天神列於甘泉宮金人率長丈餘不祭祀但燒香禮  
 拜而已此則佛道流通之漸也及開西域遣張騫使  
 大夏還傳其旁有身毒國一名天竺始聞有浮屠之  
 教

哀帝元壽元年博士弟子秦景憲受大月氏王使伊  
 存口授浮屠經中土聞之未之信了

西方言華言譯之則謂淨覺

浮屠正號曰佛陀其聲相近皆

後漢明帝夜夢金人頂有日光飛行殿庭乃訪群臣  
 傳毅始以佛對帝遣郎中蔡愔及博士弟子等使於  
 天竺寫浮屠遺範愔仍與沙門攝摩騰竺法蘭東還  
 雒陽中國有沙門及跪拜之法自此始也愔又得佛  
 經四十二章及釋迦立像帝令畫工圖佛像置清涼  
 臺及顯節陵上經緘於蘭臺石室愔之還也以白馬  
 負經而至漢因立白馬寺於雒陽雍關西摩騰竺法



蘭咸卒於此寺

草帝時楚王英喜為浮屠齋戒遣郎中令奉黃縑白

紵三十疋詣相國以贖愆詔報曰楚王尚浮屠之仁

祠潔齋三月與神為誓何嫌何疑當有悔吝其還贈

以助伊蒲塞桑門之盛饌因以書示諸國

伊蒲塞循優波塞桑

門沙門地

桓帝設華蓋以祠浮圖

魏明帝時欲壞宮西佛圖外國沙門乃金盤盛水置

於殿前以佛舍利投之於水仍有五色光起於是幸

歎曰自非靈異安得爾乎遂徙于道為作周問百四

佛圖故處鑿為濛汜池種芙蓉於中

晉明帝好佛手畫形像經歷寇難而堂存宜城王為

之頌

孝武太元六年正月帝初奉佛法立精舍于殿內引

諸沙門以居之

後魏道武帝初平中山經畧燕趙所經郡國佛寺見

諸沙門道士皆致情敬禁軍旅無有所犯帝好黃老

頗覽佛經但天下初定戎車屢動庶事草創未建圖

宇招延僧衆然時時訪求先是有沙門僧朗與其徒

隱於泰山之岷岫谷帝遣使致書以繪素旃罽銀鉢



為禮號曰朗公谷初神元與魏晉通聘文帝久在雒陽昭成又至襄國乃備究南夏佛法之事

臣欽若等日自神元

至昭成皆追册帝號

天興元年詔曰夫佛法之興其來遠矣濟益之功無分存歿神蹤遺軌信可依憑其勅有司於京城建飾容範修整宮室令信何之徒有所居止是歲始作五級佛圖耆閣崛山及須彌山殿加以續飾別構講堂禪室及沙門座莫不嚴具焉

明元帝好黃老及崇佛法京邑四方建立圖像仍令沙門敷導民俗初黃始中趙郡有沙門法果戒行精

**釋** 開演法籍道武聞其名詔以禮徵赴京師後以為

道人統攝僧徒每與之言多所愜允供施甚厚至是彌加崇敬永興中前後授以輔國宜城子忠信侯安成公之號皆固辭帝嘗親幸其居以門小狹不容輿輦更廣大之年八十餘卒帝三臨其喪追贈老壽將軍趙胡靈公先是法果每言道武明元好道即是當今如來沙門宜應盡禮遂嘗致拜謂人曰能弘道者人主也我非拜天子乃是禮佛耳法果四十始為沙門有子曰猛詔令襲果所加爵帝後幸廣宗有沙門曇證年且百歲邀見於路奉致果物帝敬其年老志



力不衰亦加以老壽將軍之號  
太武帝遵道武明元之業每引高德沙門與其談論  
於四月八日輿諸佛像行於廣衢帝親御門樓臨觀  
散花以致禮敬先是沮渠蒙遜在涼州亦好佛法有  
罽賓沙門曇摩識習諸經論於姑臧與沙門智高等  
譯涅槃諸經十餘部又曉術數禁呪歷言他國安危  
多所中驗蒙遜每以國事諮之神廡中帝命蒙遜送  
識詣京師惜而不遣旣而懼魏威責遂使人殺識識  
死之日謂門徒曰今時將有客來可早食以待之食  
訖而走使至時人謂之知命帝初平赫連昌得沙門  
惠始姓張家本清河聞鳩摩羅什出新經遂詣長安  
見之觀習經典坐禪於白渠北晝則入城聽講夕則  
還處靜坐三輔有識多宗之宋高祖爲晉太尉滅姚  
泓留子義真于長安及其去也赫連屈丐追敗之道  
俗少長咸見坑戮惠始身被白刃而體不傷衆大怪  
異言於屈丐屈丐大怒召惠始於前以所持寶劍擊  
之又不能害乃懼而謝罪昌平惠始到京都多所訓  
導時人莫測其迹帝甚重之每加禮敬始自習禪至  
於没世稱五十餘未嘗寢卧或時跣行雖履泥塵而  
不汚足色愈鮮白世號之白脚終於八角寺



文成帝興安元年詔曰夫爲帝王者必祗奉明靈顯彰二道其能惠著生民濟益群品者雖在古昔猶序其風烈是以春秋嘉崇明之禮祭典載功施之族况釋迦如來功濟大千惠流塵境尋生死者歎其達觀覽文義者貴其沙門助王政之禁律益仁智之善性排斥群邪開演正覺故前代以來莫不崇尚亦我國家嘗所尊事也世祖太武皇帝開廣邊荒德澤遐及沙門道士善行純誠惠始之倫無遠不至風義相感徃徃如林夫山海之深怪物多有姦滯之徒德容假託講寺之中致有竟黨是以先朝因其瑕釁戮其有

罪有司失旨一切斷禁景穆皇帝每爲慨然值軍國多事未遑修復朕承洪緒君臨萬邦思述先志以隆斯道今制諸州郡縣於衆居之所各聽建佛圖一區任其財用不制會限其好樂道法欲爲沙門不問長幼出於良家性行素篤無諸嫵穢鄉里所明者聽其出家率大州五十人小州五十人其郡遠臺者十人各當局分皆足以化惡就善播揚道教也初太武詔誅長安沙門焚破佛像勅留臺下四方令一依長安行事至是復之所毀圖寺仍還修復佛像經論皆得顯傳京師沙門師賢本屬賓國王種人少入道東遊



涼城涼平赴京罷佛法時師賢假爲醫術還俗而守道不改於修復日即反沙門其同輩伍人帝皆親爲下髮師賢仍爲道人統是年詔有司爲石像令如帝身既成頭上足下各有黑石冥同帝體上下黑子論者以爲純誠所感

興光元年秋勅有司於五級大寺內爲太祖已下五帝鑄釋迦立像五各長一丈六尺都用赤金二十五萬斤

太安初有師子國胡沙門邪奢造多浮陀難提等五人奉佛像三到京都皆云備歷西域諸國見佛影迹及肉髻外國諸王相求咸遣工匠摹寫其容莫能及難提所造者去十餘步視之炳然轉近轉微又沙勒胡沙門赴京師致佛鉢并畫像迹

和平初以僧曇曜爲沙門統初曇曜以復佛法之明年自中山被命赴京值帝出見於路御馬前馬前啣曜衣時以爲馬識善人帝後奉以師禮曇曜白帝以京城西武州塞鑿山石壁開窟五所鑄建佛像各一高者七十尺次六十尺雕飾奇偉冠於一世曇曜奉平齊戶及諸民有能歲輸穀六十斛入僧曹者即爲僧祿戶粟至於儉歲賑給饑民又請民犯重罪及官



奴以爲佛圖戶以供諸寺掃灑歲蕪營田輸粟帝並許之於是僧祇戶粟及寺戶遍於州鎮矣曇曜又與天竺沙門嘗那邪舍等譯出新經十四部又有沙門道進僧超法存等並有名於時演唱諸典

獻文天安中起永寧寺構七級佛圖高三百餘尺基架博敞爲天下第一又於天宮寺造釋迦立像高四十三尺用赤金十萬斤皇興中又構三級石佛圖椽棟楹楹上下重結大小皆石頭高十丈鎮固巧密爲京華壯麗其後傳位於太子穆御北苑崇光宮覽習玄籍建鹿野佛圖於苑中之西山去崇光右十里巖

房禪舍禪僧居其中

孝文承明元年八月詔起建明寺

太和元年二月幸永寧寺設齋赦死罪囚

三月又幸永寧寺設會行道聽講命中祕三省與僧徒討論佛義施僧衣服寶器有差又於方山道武營壘之處建恩遠寺自興光後至北京城內寺新舊且百所僧尼二千餘人四方諸寺六千四百七十八僧尼七萬七千二百五十八人

四年正月丁巳罷畜鷹鷄之所以其地爲報德佛寺初文明皇后生獻文帝帝立尊爲皇太后至是詔罷



鷹師及諸鷲傷生之類宜放之山林以其地爲太后立寺

十五年八月戊戌移道壇於桑乾之陰改曰崇虛寺十六年詔四月八日七月十五日聽大州度一百人爲僧尼中州五十人下州二十人以爲嘗准著於令十七年詔立僧制四十七條

十九年四月帝幸徐州白塔寺顧謂諸王及侍臣曰此寺近有各僧嵩法師授成實論于羅什在此流通後授淵法師淵法師授登紀二法師朕每翫成實論可釋人染情故至此寺焉時沙門道登雅有義業爲

帝眷賞嘗時講論曾於禁內與帝夜談同見一鬼及卒帝甚悼惜之詔施布一千疋又設一切僧齋并命京城七日行道又詔曰朕道登法師奄至徂背痛怛摧慟不能已已比藥治隕喪未容卽赴便準師義哭諸門外祭奠之又有西域沙門各跋陀素有道業深爲帝所敬信詔於少室山陰立少林寺而居之公給衣供

二十一年五月詔曰羅什法師可謂神出五才志入四行者也今嘗住寺猶有遺地欽悅修蹤情深遐邇可於舊堂所爲建三級浮圖又見逼昏雲爲道殄軀



既甦同俗禮應有子孫可推訪以聞當加序接先是  
 立建福曹又改為昭玄備有官屬以斷僧務時沙門  
 道順會覺僧意惠紀僧範道弁惠度智誕僧顯僧義  
 僧利並以義行知重

宣武帝景明元年詔大長秋卿白整準大京靈巖寺  
 石窟於維南伊闕山為高祖文昭皇太后營石窟二  
 所初建之始窟頂去地三百一十尺至正始二年終  
 始斬山二十三丈大長秋卿王質謂斬山太高費功  
 難就奏求下移就平地去一百尺南北一百四十尺

永平中中尹劉勝奏為帝復造石窟一凡為三所從  
 景明元年至正始四年六月已前用功八十萬二千

三百六十六

永平元年秋詔曰緇素既殊法律亦異故道教彰於  
 玄顯禁勸各有所宜自今已後衆僧犯殺人已上罪  
 者仍依俗斷餘犯付昭玄以內律僧制治之

二年冬沙門統惠深上言僧尼浩曠清濁混流不遵  
 禁典精麤莫別輒與經律法師群議上制諸州鎮郡  
 維那上座寺主各令戒律自修咸依內禁若不解經  
 律者退其本次又出家之人不應非法積入不淨物  
 然經律所制通塞有方依律車牛淨人不淨之物不  
 得為已私畜惟有老病年六十已上者限聽一乘又



比來僧尼或因三寶出貨私財自此不得更爾又出家捨著本無凶儀不應廢道從俗其父母三師遠聞凶問聽哭三日若在見前限以七日或有不安寺舍遊止民間亂道生過皆繇此等若有犯者脫服還民其有造寺者限僧五十以上啓聞聽造若有輒營置者處以違勅之罪其寺僧衆擯出外州僧尼之法不得爲俗人所使若有犯者選配本屬其外國僧尼來歸化者求精舍簡有德行合三藏者聽任若無德行遣還本國若其不去依此僧制治罪詔從之是年十一月帝於試乾殿爲諸僧朝臣講維摩詰經

二年冬迎弘農荆山造珉玉丈六像置於維濱之報德寺帝躬觀致敬

四年夏詔曰僧祇之粟本朝濟施儉年出貨豐則收入山林僧尼隨以給施民有窘弊亦卽賑之但主司冒利規取贏息及其徵責不計水旱或償利過本或翻改券契侵蠹貧下莫知紀極細民嗟毒歲月滋甚非所以矜此窮乏崇尚慈極之本意也自今已後不得專委維那都尉可令刺史共加監括尚書簡諸有僧祇穀之州別列其元數出入贏息賑給多少並貸償歲月見存未收上臺錄記若收利過本及翻改初



券依律免之勿復徵責或有私債孺施償僧卽以丐民不聽收簡後有出貸先盡貧窮徵責之科一准舊格富有之家不聽輒貸脫仍冒濫依法治罪時尚書令高肇奏言謹案故沙門統曇曜昔於承明元年奏度涼州軍戶趙荀子等二百家爲僧祇戶立課積粟擬濟饑年不限道俗皆以拯施又依內律僧祇戶不得別屬一寺而都維那僧暹僧頻等進違成旨退乖內法肆意任情奏求逼召致使呼嗟之怨盈於行道棄子傷生自縊溺死五十餘人豈是仰贊聖明慈育之志深失陛下歸依之心遂令此等行號巷哭叫訴

無所至乃白羽貫耳列訟宮闕悠悠之人尚爲哀痛况慈悲之士而可安之計聽荀等還鄉課輸儉乏之年周給貧寡若有不虞以擬捍邊其暹等違旨背律謬奏之愆請付昭玄依僧律推處詔曰暹等特可原之餘如奏帝篤好佛理每年嘗於禁中親講經論廣集名僧標明異旨沙門以修錄爲內起居焉帝既崇之下彌企尚至延昌中天下州郡僧尼寺積有一萬三千四百三十七所徒侶逾衆

孝明熙平元年詔遣沙門惠生使西域採諸經律及還京師所得經論一百七十部行於世時帝於城內



大社西起永寧寺靈太后親率百寮表基立剎佛圖九層高四十餘丈其諸費用不可勝紀景明寺佛圖亦其亞也至於官私寺塔其數甚衆

神龜元年冬司空尚書令任城王澄奏曰仰惟高祖定鼎嵩瀍卜世悠遠慮括始終制洽天人造物開符垂之萬葉故都城制云城內惟擬一永寧寺郭內唯擬尼寺一所餘悉城郭之外欲令永遵此制無敢踰矩逮景明之初微有犯禁故世宗仰修先志爰發明旨城內不得造立浮圖僧尼舍亦欲絕其希覬文武二帝豈不變尚佛法蓋以道俗殊歸理無相亂故也

但俗眩虛聲僧貪厚潤雖有顯禁猶自冒營至正始三年沙門統惠深有違景明之禁便云營就之寺不忍移毀求自今已後更不聽立先旨寬容抑典從請前班之詔仍卷不行後來私謁彌以奔競永平二年深等復立條制啓云自今已後欲造寺者限僧五十已上聞輒聽造若有輒營置者依俗違勅之罪其寺僧衆擯出外州爾來十年私營愈盛罪擯之事寂爾無聞豈非朝格雖明恃福共毀僧制徒立顧利莫從者也不俗不道務爲損法人而無厭其可極乎夫學迹冲妙非浮識所辨玄門曠寂豈短辭能究然淨居



塵外道家所先功緣冥深匪尚華遁苟能誠信童子聚石可邁於道場純頭陀儉設足薦於雙樹何必縱其盜竊資營寺觀此乃民之多幸非國之福也然比日私造動盈百數或剽請公地輒樹私福或啓得造寺限外廣制如此欺罔非可稍計臣以才劣誠忝公務奉遵成規裁量是總所以披尋舊旨研究圖格輒遣府司馬陸昶屬崔孝芬都城之中及郭邑之內簡括寺舍數剽五百空地表剝未立塔宇不在其數民不畏法乃至於斯自遷都已來年踰二紀寺奪民居三分且一高祖立制非徒欲以緇素殊途抑亦防微

深慮世宗述之亦不可錮禁營福當在先塞未萌今之僧寺無處不有或比滿城邑之中或連溢屠沽之肆或三五少僧共爲一寺梵唱屠音連簷接響像塔纏於腥臊性靈沒於嗜慾真僞混居往來紛雜有司因習而莫非僧曹對制而不問其餘汚染真行塵穢練僧薰猶同噐不亦甚歟往在北伐有法秀之謀近日冀州遭大乘之變皆初假神教以惑衆心終設姦誑用逞私悖太和之制因法秀而壯遠景明之禁慮大乘之將亂始知祖宗獻聖防邊慮深履霜堅冰不可不慎昔如來闡教多依山林今此僧徒戀着城邑



豈湫隘是經行所宜浮誼必栖禪之宅當繇利引其  
心莫能自止處者既失其貞造者或損其福乃釋氏  
之糟糠法中之社鼠內戒所不容王典所應棄矣非  
但京邑如此天下州鎮僧寺亦然侵奪細民廣占田  
宅有傷慈矜用長嗟苦且人心不同善惡亦異或有  
栖心真趣道業清遠者或外假法服內懷悖德者如  
此之徒宜辨涇渭若雷同一貫何以勸善然觀法贊  
善凡人所知隨俗避嫌物情同趣臣獨何爲孤議獨  
發誠以國典一廢追理至難法網斲失條綱將亂是  
以冒陳愚見兩願其益臣聞設令在於必行立罰貴

能肅物令而不行不如無令罰不能肅孰與亡罰頃  
明詔屢下而造者更滋嚴限驟施而爲犯不息者豈  
不以假福託善幸罪不加人殉其私吏難其劾前制  
無追徃之辜後旨開自今之恕悠悠世情遂忽成法  
今宜加以嚴科特設重禁糾其來遠懲其徃失脫不  
峻簡方垂容惜恐今旨雖明復如徃日又旨令所斷  
標榜禮拜之處悉聽不禁愚以爲樹榜無嘗禮處難  
驗欲令有造立榜證公湏營之辭旨以言嘗禮如此  
則徒有禁名實通造路且臨御已後斷詔四行而私  
造之徒不惧制而止豈是百官有司怠於奉法將繇



網漏禁寬容託有佗故耳如臣愚量都城之中雖有標榜營造之功事可改立者請依先制在於郭外任擇所便其地若得券證分明者聽其孺施若官地盜作買即令還官若靈像既成不可移徹請依令勅如舊不禁今悉坊內行止不聽毀坊開門以妨里內通巷若被旨者不在斷限郭內准此商量其廟像嚴立而逼近屠沽者請斷旁屠殺以潔靈居雖有僧數而事在可移者令就閑敞以避溢漏如今年正月勅後造者求依僧制案法科治若僧不滿五十者共相通容小就大寺必令克限其地賣還一如上式自今外

州若欲造寺僧滿五十以上先令本州表列昭玄量審奏聽乃立若有違犯悉依前科州郡以下容而不禁罪同違旨庶仰遵先皇不朽之業俯奉令旨慈悲之令則繩墨可全聖道不墜矣奏可未幾天下喪亂加以河陰之酷朝士死者其家多捨居宅以施僧尼京邑第舍略爲寺矣前日禁令不復行焉

後周太祖爲魏丞相雅好談論并簡名僧深識玄宗者一百人於第內講說又令行臺學士薛慎等十二人兼學佛義使內外俱通繇是四方競爲大乘學丞相府記室參軍盧光性崇佛道至誠信敬嘗從帝狩



於檀臺山時獵圍既合帝遙指山上謂群公等有所見不咸曰無見光獨曰見一桑門帝曰是也卽解圍而還令光於桑門立處造浮圖搗臺一丈得瓦鉢錫杖各一帝稱歎因立寺焉

武帝天和四年二月帝御大德殿集百寮道士沙門等討論釋老義

宣帝大象元年初復佛像及天尊像初武帝至德三年斷佛道二教像悉毀罷至是復之帝與二像俱南面而坐大陳雜戲令京城士民縱觀

靜帝以大象二年卽位復行佛道二教舊沙門道士

精誠自守者簡令入道

隋文帝開皇十二年令陳散騎嘗侍徐孝克於尚書都堂講金剛般若經

二十四年詔沙門道士壞佛像天尊百姓壞嶽瀆神像皆以惡逆論帝年齡晚暮尤崇尚佛道故也

仁壽元年六月頒舍利於諸州

唐太宗貞觀三年十二月癸丑詔曰至人虛已忘彼我於胷懷三教慈心均異同於平等是知上聖惻隱無隔萬方大悲弘濟義猶一子有隋失道九服沸騰朕親總元戎致茲明罰誓收登陬曾無寧歲老弱被



其桀犬愚戩嬰此湯羅嚼鬚義憤捐軀抗節各殉所  
奉咸有可嘉日往月來逝川斯遠雖復項籍放命封  
樹紀於丘墳紀信捐生丹書著於圖史猶恐九泉之  
下尚淪鼎鑊八難之間永纏氷炭愀然疚懷用忘興  
寢思所以樹立福田濟其營魄可於建義已來交兵  
之處爲義士凶徒殞身戎陣者立寺刹焉乃詔虞世  
南李百藥褚亮顏師古岑文本許敬宗朱子奢等爲  
之碑銘以紀功業時沙門玄奘於中天竺國將梵本  
經論六百餘部而歸太宗竒之召高業沙門與之翻  
譯出三藏聖教太宗爲其論序皇太子重闡斯美乃

著述聖記以廣其義

十六年五月御製懺文於弘福寺曰聖哲之所尚者  
孝也仁人之所愛者親也朕幼荷鞠育之恩長蒙撫  
養之訓蓼莪之念何日忘之罔極之情昊天匪報昔  
子路歎千鐘之無養虞丘嗟二親之不待方寸亂矣  
信可悲夫朕每痛一月之中再罹艱疚興言永慕哀  
切深衷欲報靡因唯資冥助敬以絹二百疋奉於大  
道儻至誠有感異消過去之愆爲善有因庶獲後緣  
之慶

高宗永徽二年八月廢玉華殿以爲佛寺



顯慶元年四月戊申御安福門樓觀慈恩寺僧玄奘等迎御製書慈恩寺碑文向寺諸寺皆造幡蓋飾以金寶窮極瓌麗太嘗及京城音樂車數百兩僧尼執幡兩行導從士女觀者填噎街衢自魏晉以來崇事釋教未嘗有如此盛者也

乾封元年正月戊辰朔有事於泰山詔兗州置觀寺各三所其觀以紫雲仙月萬歲爲稱其寺以封巒非煙重輪爲名各度七人天下諸州別置一觀一寺各度七人

中宗神龍元年二月制天下諸州各置寺觀一所咸

以大唐中興爲名

九月制曰如聞天下諸觀皆畫化胡之變諸寺亦畫老君之形一種尊容兩俱不可限制到後十日並除却若有故留者卽科違勅罪其化胡經先有明勅禁斷如聞在外仍頗流行自今諸部化胡經事及餘說化胡事處並宜除削

三年七月丁酉以所造長樂坡大像工役稍廣百姓多怨嗟制罷之

玄宗開元二十年都城僧等奏日伏請以每歲八月于衛國天宮等寺轉經行道至九月罷爲陛下修福



在京於雲化興善等寺歲以爲嘗許之

二十三年九月親注金剛經及修義訣中書令張九齡等上言臣等伏見御注前件經及義訣佛法宗旨撮在此經人間傳習多所未悟陛下曲垂聖意敷演微言幽闡妙鍵豁然洞達雖臣等愚昧本自難曉伏覽睿旨亦旣發明是知日月旣出天下普昭誠在此也陛下至德法天平分儒道已廣度其僧又不違其願三教並列萬姓知歸伏望降出御文內外傳授帝手詔報曰僧徒固請欲以興教心有所得輒復疏之今請頒行仍慮未愜簡較釋門威儀僧思有奏曰自

像教西流貝文東譯學傳師口凡今則多訖訣聖情前古未有臣請具幢扎奉迎於敬愛寺設齋慶賀其御注經伏乞示天下宜付史官許之

二十六年正月丁酉制曰道釋二門皆爲聖教義歸弘濟理在尊崇其天下觀寺大小各度一十七人簡擇灼然有經業戒行爲鄉閭所推仍先取年高者二十七年二月制天下觀寺每于齋日宜轉讀經典懲惡勸善以闡文教

天寶四載九月詔曰波斯經教出自大秦傳習而來久行中國爰初建寺因以爲名將欲示人必修其本



其兩京波斯寺宜改爲大秦寺天下諸府郡者亦宜准此

十載六月帝以先帝忌日命女工綉釋迦牟尼佛像親題繡額稽首祈福

冊府元龜

淮南李嗣京叅閱

西極文翔鳳訂正

豫章黃國琦較釋

帝王部 五十二

崇釋氏第二

唐肅宗至德中內置道場供奉僧晨夜念佛動數百人聲聞禁外中書侍郎平章事張鎬知之奏曰臣聞天子修福當在安養舍生靖一風化未聞區區僧教以致太平伏願陛下以無爲爲心不以小乘撓聖慮



也肅宗甚然之

上元二年四月甲申詔於唐興寺設高座講論二教  
七月癸巳於景龍觀設高座講論道釋二教

代宗寶應元年八月癸酉詔曰道釋二教用存善誘  
至於像設必在尊崇如聞州縣公私多借寺觀居止  
因茲褻黷切宜禁斷務令清肅其寺觀除三綱并老  
病不能支持者餘並仰每日二時行道禮拜如有弛  
慢並量加科罰

時天下公私等事多借寺觀  
居止代宗恐其褻黷因詔

又詔曰

教宗清淨禮避嫌疑其僧尼道士非本師教主及齋  
會禮謁不得妄託事故輒有往來非時聚會並委所  
繇官長勾當所有犯者准法處分亦不得因茲攪擾  
分明告示咸使知悉

廣德元年七月壬子大赦改元制河南河北僞度僧  
尼道士女冠並與王度

二年四月壬申以玄宗諱日度僧道凡數百人乙酉  
以肅宗諱日度僧道凡數百人

永泰元年九月於京城資聖西明兩寺置百高座講  
仁王經內出二寶輿中命有力者衣金甲昇出又結  
彩爲菩薩神王及八部鬼神羊車鹿車牛車內侍魚  
朝恩護送宰臣及百官列班於光順門觀禮宰臣等



表請依班序節級率錢以資僧供二七日而罷又詔宰臣及兩省五品已上官尚書省四品已上官御史大夫中丞諸司長官並於西明寺行香修齋奏樂竟日而罷俄以吐蕃回紇入寇罷百高座講經十月復講經於資聖寺

大曆三年正月乙丑帝幸章敬寺行香凡度僧尼一千人

二月辛丑萬年縣鎮國寺有胡僧純陀自言六百歲臨終遣弟子詣闕以衣鉢傳奉皇帝帝遣中官以紫衣賜之又遣中官吊祭并護葬事是月興善寺不空

三藏上言寺院佛塔先因地震陷折今將增修下見古塹得一小棺其長尺餘發而視之凡積十餘重棺皆金寶裝飾中有舍利骨及佛髮一條色青而奉其長數尺每棺一鎖規製妙絕有殷仲文題贊處甲辰內出寶輿具威儀迎入內道場奉之

七月特賜章敬寺孟蘭盆時寺宇新成帝增罔極之恩勅百官詣寺行香

四年正月帝以章敬皇太后忌辰度僧尼道士凡四百人是月以修功德使大濟禪師廓清簡較殿中監廓清京城興唐寺僧也以修功德承恩特賜袈裟及



廐馬出入禁中無時初賜號大濟至是又寵以班秩京師諸僧咸憚之

二月南天竺國僧三藏文殊德上言廣州南界蕃人新營兩寺望賜寺名詔以寶應廣德二名賜之

七月庚申文成殿置道場爲萬姓祈福是日佛見光相自子至丑久而不散六宮近侍咸覩文武百官尚書左僕射裴冕等表賀曰聖德動天湛恩育物齋心甲夜稽首梵筵助玄造於慈元登蒼生以壽域休徵允答聖功契符騰神光於玉毫發睟容於金殿宮中咸覩夜後如初臣等得奉殊祥無任歡欣之至伏請

編諸史冊宣示中外手詔答曰朕嗣守鴻業恭臨寶位夕惕若厲蹈乎春冰啓三乘之真如爲萬姓以作福大雄感應示現毫光茂對禎祥多慙薄德卿等百辟勤修庶政休徵薦集慶慰當深所請編之史冊宣示中外者依

七年正月興善寺僧特進試鴻臚卿三藏不空獻所翻譯佛經特許編入一切經目不空表曰爰自幼年承事先師大弘三教和尚二十有四載稟授瑜伽法門後遊五天尋求所未授者外諸經論更重學習凡得梵本瑜伽真言經論五百餘部奉爲國家詳譯聖



言廣崇福祐天寶五載却至上都奉玄宗皇帝恩命於宮內建立灌頂道場所齋梵經盡許翻譯及肅宗皇帝配天繼聖特奉綸音於內道場建立護摩及灌頂法又爲國譯經助宣皇化其所譯金剛灌頂瑜伽法門是成佛速邪之路其修行者必能頓超凡境達於彼岸餘部真言諸佛方便其徒不一所譯諸大乘經典皆是上資邦國息滅災厄星辰不愆風雨順序仰恃佛力輔成國家謹繙集前後所翻譯自開元至今凡一百一卷七部以聞詔下有司宣付中外八年正月乙未勅天下寺觀僧尼道士不滿七人者

宜度滿七人三七人以上者更度一人二七人以下者更度三人

五月庚子以太宗諱日命有司修四千僧齋於服成寺

八月戊午修一萬僧齋於慈恩寺爲萬姓祈福九年丙戌以肅宗諱日度僧尼道士凡二百餘人

六月癸未興善寺僧試鴻臚寺卿不空三藏卒輟朝三日不空西域胡僧也敏智多聞學通釋氏經論曉知蕃漢音旨翻譯貝葉經凡數萬言帝甚敬之及卒乃下詔曰大道之行同合於異相王者至理總歸於



正法方化成之齊致何儒釋之殊塗故前代帝王罔  
不崇信法教弘闡與時偕行特進試鴻臚卿大興善  
寺三藏沙門大廣智不空我之宗師人之舟楫超詣  
三學坐離于見聞修持萬行嘗示於化滅執律捨縛  
護戒爲儀繼明善教之志來受人王之請朕在先朝  
早聞道要及當付囑嘗所歸依每每執經內殿開法  
前席凭几同膠序之禮順風比崆峒之問而妙音圓  
演密行內持待扣如流自涯皆悟滌除昏妄調伏魔  
寃天人洗心於度門龍鬼受職於神印固以氣消災  
厲福致吉祥實惟弘我之多寧止利吾之美當有命

秩用伸優禮而得師爲盛味道滋深思復強名載明  
前志夫妙界有莊嚴之士內品有果地之儀本乎尚  
德敬順時典可開府儀同三司仍封肅國公贈司空  
謚曰大辯正廣智不空三藏和尚  
德宗貞元四年八月御通化門觀章敬寺迎御書院  
額并鼓吹闋神策馬技  
五年三月詔曰釋道二教福利群生館宇經行必資  
嚴潔自今州府寺觀不得宿客居住屋宇破壞各隨  
事修葺

八月詔天下諸上州並宜國忌日准式行香



六年二月乙亥詔葬佛骨於岐陽初岐陽有佛指骨寸餘葬於無憂王寺或奏請出之以示衆帝乃出之置於禁中精舍又送於京師佛寺傾都瞻拜施財物累鉅萬是日命中官送歸岐陽左神策行營節度使鳳翔尹邢君牙迎護葬於舊所

八年七月丁卯幸章敬寺

九年五月賜故杭州徑山寺僧法欽謚曰大覺禪師六月詔定國忌日寺觀齋僧道人數有差

十二年九月右神策等軍上言宴設堂去年臘日蒙車駕臨幸請置寺以貞元鎮國爲名從之又詔虢州

闕鄉縣龍興寺故阿足師宜謚大圓禪師

十三年四月於曲江南彌勒閣置寺以貞元普濟爲名

七月右神策軍中尉霍仙鶴患特賜馬十匹令諸寺設齋祈福

十月景公寺僧寂寬等於京兆府狀訴綱維乾俊等典賣承前勅賜御衣府司推勘所典賣並緣嘗住寺用禁繫乾俊等奏請科罪帝曰本來施與寺家之物若自盜竊法律有文今乃不爲私情事緣嘗住正當施與之意豈合書以罪名若施與而今存乃是勞力



寺家殊非本施之意僧之言告乃是無知更欲科繩深所無謂宜並釋放

十四年正月南天竺國先進華嚴經殊梵本僧般若三藏領到令保壽寺僧智柔圓炤道監虛舟智通等十八人同於崇福寺翻譯成四十卷

十六年四月以故第二祖惠可禪師賜謚爲大祖禪師

憲宗元和二年九月乙巳許成都府置聖壽南平二佛寺

三年三月辛亥河中僧惠琳撰一切經音并目錄一

百三卷表獻之

六年正月丁巳勅諫議大夫孟簡給事中劉伯芻工部侍郎歸登右補闕蕭俛同就醴泉佛寺閱翻譯大乘本心地觀經

十年三月甲申西明佛寺僧遷寺中之毘沙門神像於開業寺帝命假之騎軍前後翼衛其徒以幢蓋引侍凡數里不絕觀者傾都

五月詔京城寺觀講宜准興元元年九月一日勅處分諸畿縣講宜勒停其觀察使節度州每三長齋月任一寺一觀置講餘州悉停惡其聚衆且虞變也



十二年二月丙申置元和聖壽佛寺於右神策軍  
五月賜興佛寺絹布一百端疋

十三年四月甲寅幸興福寺賜絹三百疋辛酉西市  
百姓於芳林門爲無遮僧齋命使以香施之

十二月庚戌僧惟應等辭赴鳳翔法門寺迎佛骨命  
高品中使杜英琦監焉是月癸亥命使齋香監領  
宮人十三人赴臨臯驛迎佛骨先是功德使奏鳳翔  
府法門寺有護國真身塔塔內有釋迦牟尼佛指骨  
一節其本傳以爲當三十年一開開則歲豐人安至  
來年合發詔許之及至又命使領禁兵與僧徒迎

護開光順門以納之留禁中二日乃送京城佛寺

十四年四月乙卯御勤政樓觀都人設僧齋之會陳  
雜樂百戲日入而罷

穆宗以元和十五年正月卽位二月河東節度使裴  
度奏今月四日五臺山佛光寺側慶雲現中有金人  
乘後狻頰領徒千萬如金仙狀自己至申方滅  
長慶三年八月自複道達興慶宮至通化門賜丐僧  
等絹二百疋遣中使劉克明以錢二百五十貫絹二  
百五十疋賜弘福寺以發新鐘

十一月幸通化門觀作毘沙門神因賜絹五百疋



十二月以錢一千貫賜章敬寺又賜毘沙門神額曰  
毘沙天王導以幡幢帝御望仙門觀之遂舉樂雜戲  
角抵極歡而罷

敬宗寶曆元年二月己卯賜化度寺經院金字額寶  
曆聖福之院功德使具雜戲聲樂迎以赴寺帝御日  
迎樓觀之丁亥詔兩街佛寺置方等受戒壇場自三  
月十日至四月十日停仍令兩街功德使各選擇有  
戒行僧謂之大德者考試僧能暗記經一百五十紙  
尼能暗記經一百紙即令與度此事停廢已久所在  
長吏方喜耕織者稍  
衆今忽重置蓋寶壽寺僧法真  
因道場修功德奏論得請也

八月己丑蓬萊殿會沙門道士共四百人賜食燕給  
茶絹有差

二年三月庚午鄭滑觀察使李聽上言隋大業初高  
祖神堯皇帝任鄭州刺史日為太宗文皇帝疾恙祈  
福於滎陽縣大海佛寺其荅如響因建一石像像下  
刊紀其事凡十六字歲月既遠盡翳於土壤中今滎  
陽縣令李元慶新加嚴飾刺史張仲方立石為文不  
敢不奏

文宗太和元年十月江西奏洪州道一禪師元和中  
賜謚大寂其塔未蒙賜額詔賜名圓證之塔



二年七月浙西道觀察使李德裕奏潤州鶴林寺故  
禪師玄素傳牛頭山第五祖智威心法是徑山大覺  
之師伏請依釋門例賜謚號大額勅宣賜謚大律禪  
師大寶般若之塔

十月河中觀察使薛平奏中條山蘭若營造之初有  
兩泉湧出今因降誕請號爲太和寺許之

開成二年二月甲辰王彥進准宣索內典目錄十二  
卷乙巳以太宗皇帝先置毘沙門神及功德在蓬萊  
殿是日移出配諸寺安置

三月甲戌以彗星見命京師諸佛寺開仁王經道場

宣宗以會昌六年卽位五月勅上都添僧尼寺一所  
每寺三十人

大中元年閏三月帝御紫宸殿謂宰臣曰佛雖異方  
之教深助理本所可存而勿論不欲過毀以傷令德  
乃遣下詔有會昌中靈山古迹招提棄廢之地並令  
復之委長吏擇僧之高行者居焉

懿宗咸通十四年三月詔曰兩街僧道於鳳翔法門  
寺迎佛骨四月八日佛骨至京自開遠門達安福門  
迎禮之迎入內道場二日出於京城諸寺士女雲合  
威儀盛飾古無其比遂下制赦京畿及天下見禁囚



徒

後唐莊宗同光二年九月勅天下應有本朝所造寺觀宜令所在長吏取寺司嘗住物添修至萬壽節日須畢其功

十一月甲戌河南尹張全義奏萬壽節於嵩山開琉璃戒壇度僧百人勅張全義首冠王臣心明佛性資善弘於淨衆增福聚於皇基將欲壇啓琉璃人銓鷺鷥實彰忠節宜示允俞

十二月乙亥幸廣化寺祈雪

二年正月幸鄴都登黎陽山燔香於大像前

五月戊申幸龍之廣化寺開佛塔請雨

明宗天成元年十一月勅佛氏之教其來久矣既爲空寂之門不無高潔之士自淳風久散至道莫隆漸容遊惰之徒雜處緇黃之衆罔尊禁戒唯切經求託形勢以擾人蓄資財而潤己將思縱志肯樂聚居多於閭巷之間別構住持之所妄陳福業潛誘聾愚或移動居人或侵并物業如斯之弊其徒日繁朕方靜寰區務康黎庶貴臻有益共洽無私宜令徧行告諭應今日已前修蓋得寺院無令毀廢自此已後不得輒有建造如要願在僧門亦宜准佛法條例官壇受



戒不得擅私剃度

二年九月益州孟之祥令僧五人持佛牙長一寸六分云僖宗幸蜀時留之今屬應聖嘉節願資壽命宣示近臣

十月五臺山王子寺主僧人廷果狀稱爲先師廣法大師誠惠建塔請名謚爲法雨大師慈雲之塔

四年八月澤州盤亭山千峯禪寺僧洪密狀奏當院剗感應舍利塔一所乞賜塔額乃賜號爲圓空之塔長興四年七月命中使押絹五百疋施五臺山僧齋料

末帝清泰元年七月遣供奉官鄭延遂往鳳翔詔明僧阿闍黎初帝在藩屢與僧言闍黎行高知前事帝深重之

九月詔鳳翔發遣僧祐聖八師至京師

二年正月千秋節樞密使趙延壽獻金縵并大乘經十卷忻州刺史劉處讓獻金字法華經一部太原多僧舍資福一宗尤事禪譯文武間好佛者多奏其門帝頗宗奉及鎮河中鳳翔僧知數者數言帝有金輪之位岐僧阿闍黎言事多從故延壽處讓有是貢獻四月丙寅河中棲巖寺弘福院僧惠鑒言先師在龍



潛時施財起塔奏號靈應之塔師未有謚詔賜謚真  
 寂丁卯遣供奉官李彥騏鳳翔法門寺飯僧尼道俗  
 帝舊游故也乙酉功德使言左右街僧錄可肇報在  
 京諸寺院童子行者於千春節考錄及限各給得文許  
 令披剃及僧尼沙彌年滿二十受具戒伏乞開置官  
 壇緣四月十五日僧門結夏至七月十五日方滿至  
 千春節前開置戒壇從之  
時功德使奏每年誕節諸州府奏薦僧道其僧尼欲立講論科講經科表白科文章應制科持念科禪利設齋科道士女冠經法科講論科文章應制科表日辨聲讚科焚修科以試其能不從之

八月杭州錢元瓘言襲爵四年曾無顯効受鳳池之

真命降龍册以雙封臣特於府城外造寺一所前百  
 步起樓號奉固其寺額乞以龍册為名詔曰錢元瓘  
 效忠建寺比為誕節齋僧龍册為名未稱勤懇宜號  
 千春寺

十月鳳翔言僧阿闍黎卒帝嗟惜之命翰林學士為  
 誌石

三年遣供奉官劉處賓往鳳翔法門寺四月八日設  
 大齋會

晉高祖天福二年正月勅西天中印土摩竭陀舍衛  
 國大菩提寺三藏陀闍黎賜紫沙門室利縛羅



宜賜號弘梵大師

十一月于闐國僧曼哥羅贊嘗羅賜紫號昭梵大師

三年十一月庚午西京左右街僧錄可肇等齋佛牙

到闕宣付汴京收掌

十二月戊子勅河陽邢州潛龍舊宅先令選名僧住

持宜賜院額其河陽日開晉禪院邢州日廣法禪院

四年二月庚子以天和節僧乞賜紫衣師號者一百

有五寺宇賜名額者凡二十有三襄州香界延州衆

寶邢州普會相州安福懷州普護鳳翔寶蓮鄭州妙

香棣州淨念洛州天花汾州普  
京嘉福鳳州弘

利京兆悟空并州定果徐州空寂宋州普福遼州澄

節許州善提靖教陳州花臺定業東京金明善會

十二月丙辰勅凡為精舍將結勝緣清虛則神亦相

依混亂則人皆不重其或偶然乘輿率爾棲心鄉村

接漁獵之家酈里定屠沽之戶佛雖無染僧豈不輕

宜崇釋梵之因承肅人天之化所有自前院宇即且

依舊住持今後城郭村坊一切不得創造

五年二月甲子天和節道釋賜紫衣師號者凡九十

人寺宇賜名額者凡二十五所東京寶繩寶像寶花

法林西京惠雪京兆普靜兗州等覺玄機蔡州吉祥



懷州妙理襄州護國許州定水貝州寶刹博州金繩  
耀州密行代州仁壽鄴州感化潞州妙士定州毘城  
岐州善覺遺相澤州解空慈州集聖鄆州真覺  
四月癸卯建金界寺於五臺立峻極院於嵩嶽  
六年二月戊午天和節道釋賜紫衣師號者凡百三  
十有四寺宇賜名額者凡五十有九東京淨聖資壽  
西京仁聖青蓮延慶北京靜覺鳳翔弘化定州法海  
孟州興惠趙州興法襄州延壽延州興果相州妙勝  
潞州慈雲汝州清涼安州竺乾陝州仁壽邢州開心  
濮州樂壽

五月甲辰加隰彌陀國僧啞哩以佛牙汎海而至  
十二月壬子遣内班史延龕部署僧十四人宗城縣  
開置道場以鎮人爲安重榮脅制而有殺戮崇其福  
事

七年正月遣内班衛延龕鎮州開置水陸道場  
三月壬子天和節三京諸道州府奏僧尼道士乞紫  
衣師號凡百人寺觀名額五十餘處悉從之  
五月乙未秦州侯益奏臣頃歲曾爲偏將徃伐叛逆  
有願如范延光歸降兵無血刃即於招討使楊光遠  
中軍寨建一佛刹自後延光果能歸款克契發心光



遠尋施錢三百貫文與臣共力營葺今修成天王院一所乞賜名額勅以福順天王院爲名

少帝開運二年六月定州奏據郎山招收指揮使孫方簡狀當山有僧院地居山谷道扼鄉閭自番戎騷動已來邊界驚移之後多聚強壯自辦戈矛每遇賊軍皆獲勝捷其郎山爲易州之中路滿縣之隣封通此往來最爲要害乞賜院額者勅以勝福之院爲名漢隱帝乾祐二年太子率更令李守瓊上言二事其一沙門著紫比非佛門貴務奢華以邀名利諸處奏薦蓋出顏情以臣愚見不敢便望止絕每歲誕節前

據所奏薦便令其身隨薦章詣闕令功德使召兩院僧官考試所業長短以行恩澤庶絕濫舉之門

周太祖廣順二年十一月以在京潛龍宅爲佛宮賜額號天聖禪寺

三年十一月中印寺僧法進賜紫衣

世宗顯德元年三月親征河東四月丁巳幸團栢谷佛寺賜主寺僧紫衣

九月以潛龍宮爲皇建禪院遣沙門清興主之

是月齊州沙門義楚進釋氏六帖三十卷義楚少負名操亦通儒學將佛書麗事以類相從擬白氏儒書



所集帝覽而嘉之賜以紫衣其書付史館

四年十月賜京城內新四寺額以天清顯靜顯寧聖壽為名

五年四月征淮南回戊午至泗州幸普光王寺賜寺僧帛有差

六月庚午內出御衣六百餘事錢四十萬羅縠百疋分賜兩街僧道令僧道修寺觀

六年四月幸滄州駐蹕於乾寧軍賜于城內二寺名額一日迎鑾二日順聖從寺僧之請也

冊府元龜



